

三三醫書第二集第四種

醫學課兒策

杭州三三醫社出版

醫學課兒策
提要

是書爲無錫高上池先生未刊之遺稿經清季王旭高先生加註社友周小農君錄惠多年前次第一集編輯未及刊入者書用對策體以課兒之作蒐爲一帙計三萬言無言不法無法不經蓋爲人父者無不期其子之成故與他項著作自有不同之處學醫得此教師有不成爲國手者未之信也望讀者迴環三復方知余言之不謬尤望購者勿因書值之輕而並輕其文也

自序

歲癸卯鼎汾年屆五十從事醫學者近二十年每臨症尋窮究其所以然之故求之不得質之古人以尋其極致之理俾愜於心而後安於是次兒斗機年長欲與切磋斯道用策學條對例隨問隨答以得教學相長之益名之曰醫學課兒策將逐漸添補逐漸修改未敢以爲定論而問世也先錄數篇質之同人倘得直諒多聞之友教所不逮則鼎汾雖不敏竊慕先賢蘧夫子之知非謹錄初稿之目如左時

道光癸卯中秋朔日高鼎汾上池書

溫熱一

痢疾

溫熱二

中風

溫熱三

虛勞

瘧疾 燥病 濕病 暑病 瘰癧

肺病 胎前 婦人 喉痧

周序

有清以來二百數十年醫術遞變由傷寒而開治溫之道以周葉陳陳薛氏諸爲先錫邑富寧蘇之衝醫學一門名賢輩出嘉道間高錦亭先生造詣深邃著有瘍科心得集景岳新方歌邑志有傳孫文清公序而刊行王氏旭高乃其門下士也哲嗣上池學博承其家傳研究治術內外並精邑人稱之後學昔年與文孫研五遇出示其令祖所著醫學課兒策一卷并謂策中間附旁註爲旭高先生診餘過從共相商榷所註手錄一過想見當時教學相長揣摩極精非晚近淺嘗者可及方今歐風東漸國學有淪胥之勢浙中諸名彥懼中學之失傳也續行醫報訂行孤本越州裘君吉生識高學廣實綜其成函來徵書亟錄郵呈當蒙稱許付梓問世功非淺鮮惟當此保存國粹之日尤願同志諸君相與搜羅徵集毋使名家著述或致湮沒也可

醫學課兒策 周序

中華民國四年冬月無錫伯華周 鎮小農謹識

J11.00
478
2:37

樣本庫

三三醫書第二集總目

11 10 9 8 7 6 5 4 3 2 1

醫脈摘要
崇實堂醫案
千里醫案
醫學課兒策
經歷雜論
痢疾明辨
伏邪新書
鬼遺方
醫醫醫
察病指南
溫證指歸

22 21 20 19 18 17 16 15 14 13 12

女科折衷纂要
延陵弟子紀要
過庭錄存
醫中一得
醫學說約
醫學妙諦
發背對口治訣論
腳氣治法總要
集驗背疽方
伏瘟證治實驗談
肯堂醫論

33 32 31 30 29 28 27 26 25 24 23

傷科方書
和緩遺風
證治心傳
金氏門診方案
長沙證彙
治痢捷要新書
素問校義
中風論
琉球問答奇病論
羊毛瘟證論
走馬急疳方

醫學課兒策

三三醫書第二集第四種

無錫高鼎汾上池著

無錫周小農參訂

無錫王泰林旭高註

紹興裘吉生刊行

問溫病始於內經何條仲景接言者幾條後人治溫每與傷寒混者在何處
自漢以來論溫病者幾家葉天士出而直接劉河間以三焦論治而治溫之
法始詳其理安在上焦之治不外肺衛心營肺衛心營見證能詳述歟治肺
衛者何方治心營者何方兼治者何方中焦之病在陽明經府見證分別何
在白虎承氣變化幾方此外尙有何法脾藏獨不傳歟下焦之病在肝腎宜
詳見證治當何方近日治溫多宗葉氏葉氏之闕失者何在吳氏之得失安
在與葉氏可互參歟其詳晰書之

天有六氣風寒暑濕燥火惟火有二曰君曰相風濕與燥無不兼溫惟寒水與

溫相反然傷寒者必病熱溫病亦多矣哉陰陽應象大論曰重陰必陽重陽必陰故曰冬傷於寒春必病溫自漢以後醫家皆未註明因以溫病爲傷寒伏氣遂以溫病與傷寒同治由其不知故曰二字從上句來也若曰冬日嚴寒重陰者必傷人之陽而病在陽春日大熱重陽者必傷人之陰而病在陰故曰在冬則名傷寒在春則名溫病仲景傷寒論剖別分明曰太陽病發熱無汗惡寒脈浮而緊者曰傷寒發熱而渴不惡寒者曰溫病發汗已身灼熱者名曰風溫然則伏氣竟不病乎曰溫病之原有三一曰伏氣指春溫兼咳溫瘧春初惡寒之病而言二曰主氣六元正紀大論曰辰戌年初之氣民病溫厲寅申丑未歲以次而推此客氣也若每年主氣春夏之交時令大熱熱氣感人豈無溫病三曰戾氣凶荒兵亂之後與非其時而有其氣皆曰戾氣戾氣成瘟沿門相傳又可所謂瘟疫也明乎此而傷寒與溫病可以不混宋元以來諸名家不知溫病傷

寒之辨如龐安常卒病論朱肱活人書韓祇和微旨王實之證治劉守眞之傷寒醫鑑傷寒直格張子和傷寒心鏡等書每以傷寒之法治溫病用麻桂等方於心不安別立通聖九味羌活雙解等方甚至辛溫藥中加苦寒皆非理也近時論溫病者張景岳吳又可喻嘉言三家景岳以溫病爲傷寒無足論喻氏有火症斷不至化爲寒病之說分晰極清而亦用辛溫辛熱之藥是但能治春初伏氣之溫而忘乎主氣之溫病也又可直斷溫熱之原非風寒所中一以關穢爲治彼當崇禎凶荒兵火之時但能治戾氣之瘟疫忘乎伏氣主氣之溫病也兩家詳於治溫者各執己見不能融會貫通如此後之治溫病者將何從取法哉幸也葉天士出而剖晰分明謂傷寒從表入自太陽經膀胱始當從六經論傳變溫邪自口鼻入自手太陰肺經始當從三焦論重輕傷寒必困其陽當溫散以救陽得汗而寒解溫病必燄其陰當辛涼以救陰得汗而溫亦解大綱之

眉目既清三焦之治可按部而理矣試言上焦溫邪首先犯肺逆傳心包肺主衛心主營肺衛見證舌白咳嗽口渴脉右大微惡寒甚則發疹當以辛涼之品輕則銀翹竹葉蒡桔重則石膏知母元參心營見證舌紅或黑神氣模糊或見血甚則見癰當以清營之劑輕則芩連丹梔赤芍重則犀角牛黃麝玳紫雪此皆上焦見證也方主衛者銀翹散兩方白虎湯化三方主營者犀角地黃湯又合銀翹湯五汁飲梔鼓湯清營牛黃至寶紫雪共約治上焦者十方次言中焦陽明爲市病至四五日後必傳陽明而況平日積滯者最多積在腑則溫熱亦引而傳於腑其見證胸痞拒按口渴燥脉沈實承氣症也然而變化者十餘方胃實腸虛用大黃而去芒硝（爲小承氣）胃虛腸實用芒硝而去大黃（爲柴胡芒硝）腸胃實而不痞輕用硝黃去朴實（爲調胃承氣）虛者加三參（爲新加黃龍）兼上焦者加瓜蒌杏仁石膏兼心營者大黃湯化牛黃丸兼小腸

小便不通大黃同芩連丹地苦泄之液涸甚者硝黃同元參地麥合用名增液
皆承氣變法也若在經見證脈必洪大浮躁白虎三法外又有竹葉石膏化癍
湯兩方此皆中焦見證化方也若傷脾者必發黃其病最急茵陳梔子大黃湯
急救法也下焦之病見於肝者瘕厥見於腎者煩而不寐治瘕者宜龜甲鱉甲
牡蠣阿膠等治煩者黃連阿膠地芍共約十方皆從定風珠復脈黃連阿膠數
方變化壯火盛者不得用定風珠復脈邪少虛多者不得用黃連阿膠除虛瘕
不得用青蒿鱉甲若夫葉氏闕失在無消食消痰蓋溫病初起豈無夾食當用
保和之類豈無胸滿夾痰當用陷胸之類者葉氏方中獨闕而芳香化穢甘寒
生津二法實足爲溫病死中求活之方故吳又可能盪滌而短於養津香化能
治黎霍而不能治高粱葉天士能柔和而短於消痰消食能治高粱而不能治
黎霍此定論也在今日讀兩公書者去其偏而救其弊何不可互參歟

問治病必先定病名而後可按証立方王叔和雖不能自立溫病之方而傷寒例中立溫病名目九條能一一分晰其見証歟吳又可著瘟疫論瘟疫二字能詳辨歟溫病始於上焦能言其所以然歟溫病之因與傷寒分別處安在明乎死症之所以然而後可救其生溫病之死法有幾能歷歷詳言之歟溫病不用麻黃發汗者曷故而冬溫病萎蕤法獨用麻黃者曷故何者爲癰何者爲疹能詳其所生所發之源歟或曰宜托或曰宜化能剖其宜托宜化之故歟醫家以實事應人之求了然於心者先當了然於手

溫病有風溫有溫熱有溫疫有溫毒有暑溫有濕溫有秋燥有冬溫有溫瘧共九條王叔和以一切外感叙於傷寒例中悉以傷寒法治之貽患無窮今按風溫者初春陽氣始開厥陰令行風夾溫也溫熱者春末夏初陽氣弛張溫盛爲熱也溫疫者厲氣流行多兼穢濁家家如是若役使然也溫毒者諸溫夾毒穢

濁太甚也暑溫者正夏之時暑病之偏於熱者也濕溫者長夏初秋濕中生熱即暑病之偏於濕者也秋燥者秋金燥烈之氣也冬溫者冬應寒而反溫陽不潛藏民病溫也溫瘧者陰氣先傷又因於暑陽氣獨發也瘟疫論一書又可特論瘟疫一端瘟疫字從溫之半仍屬熱病但只指厲氣爲病耳不可以統治四時之溫病也試言溫病起手太陰之故夫天地一陰陽也若在時節一寒暑也而寒暑之成由風變也自秋而冬風從西北方來乃蟄栗之寒風寒必傷陽膀胱足太陽府也寒邪鬱遏陽氣而爲頭痛惡寒之傷寒自春而夏風從東南方來乃解凍之溫風溫必傷陰肺經手太陰藏也溫邪鬱遏陰氣而爲咳嗽自汗口渴身熱之溫病故傷寒從太陽經肌表始由表而裏溫病從太陰上焦始由上而下一縱一橫而寒熱之病情彰矣故曰水火者陰陽之徵兆也南北者陰陽之極致也天地之陰陽和平而萬物生人身之陰陽和平而百病却一有所偏

即爲病偏於水者病寒偏於火者病熱燭其病在水也溫之熱之燭其病在火也涼之寒之各救其偏以底於平而醫之能事畢矣雖然不明乎溫病所以死之故將何以救其生夫溫病死狀大略不外五條一曰火勢燎原血從上溢肺之化源絕者死二曰熱入心營心神內閉內閉外脫者死三曰陽明太實土克水者死四曰肝鬱發黃黃極則竅爲閉穢濁寒竅者死五曰在下焦者無非銷燂津液涸盡而死也明乎此病旣了然於心藥可了然於手下矣若夫溫病發汗不用麻黃之故可罕譬而知之今夫冬令嚴寒西北令行也西北風爲主風見之不雨風轉東南而雨來矣春夏溫暖東南令行也東南風爲主風見之不雨風轉西北而雨至矣人之汗以天地之雨名之夏令安得用辛溫之麻黃發表之藥乎且夫汗也者以陽氣爲運用以陰津爲材料陰津有餘陽氣不足又爲寒邪殺厲之氣所搏不能自出必用麻桂辛溫味薄急走之藥以運其陽氣

而汗始出故傷寒一書始終以救陽氣爲主若陽氣有餘陰津不足又爲溫熱升發之氣所燄而汗自出或不出必用羌知冬地辛涼甘潤之品培養其陰津爲材料以爲正汗之地故治溫病者始終以救陰津爲主至萎蕤用麻黃雖感冬時之溫仍有冷風外束也故以石羔治溫麻黃達表或曰溫病而誤發太陽經之汗其人熱甚血燥不能蒸汗溫邪鬱於肌表血分必發癍疹不知手經本是逆傳手太陰病不解本有必傳手厥陰心包絡之理故溫病中發疹者十八九發癍者十二三癍乃純赤大片爲肌肉病胃主肌肉胃病也赤爲營色故化以石羔知母亦可加犀角元參所謂主以鹹寒佐以苦甘法也若夫疹係紅點高起係血絡中病肺病也當主以銀勞芳香透絡薄翹辛涼解肌甘竹地元參甘寒清血一皆主以化法爲正彼吳又可出一托裏舉癍法用歸升柴芷山甲溫燥之品當春夏陽升時更升陽氣能不畏其燄津液乎此不通經文之過也

宜戒用之

(一)論寒暑由乎風變及寒風傷陽溫風傷陰之故詢是特識 (二)論溫病發汗不用麻黃或用麻黃一節理明辭暢 (三)葉氏溫熱論中有瑣碎小點淡紅色非屬陰癰即屬虛癰之說似宜補托如加減復脈之類亦托法也若又可之托裏舉癰溫燥升發斷不可從 王旭高註

問溫病上焦肺衛心營外尙有何證何方中焦脾胃外尙有何證何方下焦肝腎外尙有何證何方今人論舌苔較細古人能分辨其見證歟甘寒苦寒鹹寒能分辨其常用歟辛涼與香化用法能言其故歟古人每用敗毒散起首或陶節庵柴葛解肌其宜安在其禁安在今人每用吳氏達原飲起首其宜安在其禁安在白虎承氣復脈三方之禁能詳言歟小兒麻疹之類與癰疹同源歟婦人胎前產後之溫病丹溪謂宜先補氣血景岳謂宜急清外邪